

Eqqissisimatitsinermut Avatangiisinullu Ataatsimiititaliap

Cigarittikut taamatullu cigarittit kimmivikui utertittartussanngorlugit qularnaveeqquserneqartalernissaasa iluaqutissartai ajoqutissartaalu misissuivigeqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inerneru Inatsisartunut saqqummiuteqquneqarpoq kingusinnerpaamik UKA 2020-mi ataatsimiinneq aallartippat.
(Inatsisartunut ilaasortaq Justus Hansen, Demokraatit)

Pillugu**ISUMALIUTISSIISSUTAA****Siunnersuutip aappassaanneerpeqarnerani tunniunneqartoq**

Eqqissisimatitsinermut Avatangiisinullu Ataatsimiititaliaq suliarinninnermini ukuningga inuttaqarpoq:

Inatsisartunut ilaasortaq Nikkulaat Jeremiassen, Siumut, siulittaasoq
Inatsisartunut ilaasortaq Aqqa Samuelsen, Inuit Ataqatigiit, siulittaasup tullia
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Simigaq Heilmann, Demokraatit

Ulloq 15. oktober 2019 siunnersuutip siullermeerlugu oqaluuserineqareernerani siunnersuut ataatsimiititaliamit misissorneqarpoq.

Siunnersuutip imarisaa siunertaalu:

Aalajangiiffigisassatut siunnersuummi matumani Cigarittikut taamatullu cigarittit kimmivikui utertittartussanngorlugit qularnaveeqquserneqartalernissaasa iluaqutissartai ajoqutissartaalu misissuivigeqqullugit Naalackersuisut peqquneqarnissaat. Cigarittikut aqqusinermi pinngortitamilu takussaavallaarnerat siunnersuuteqartumit takussunartutut isigineqarpoq. Cigarittikut aamma akuutissanik ulorianartunik pinngortitamut mingutsitsisuusunik akoqarput. Siunnersuuteqartumit pingaartinneqarpoq ajornartorsiutip isiginiarneqarnissaa tamannalu pissutigalugu utertitsisarnermi periutsit misissorneqarnissaat kissaatigalugu.

Siunnersuutip Inatsisartunit siullermeerneqarnera

Ataatsimiititaliamit erseqqissassallugu pingaartinneqarpoq, immikkoortup siullermeerlugu oqaluuserineqarnerani naggataarutaasumik oqaaseqarnermini siunnersuuteqartup aamma erseqqissarmagu Cigarittikut qimaannakkat pillugit ajornartorsiutip Naalackersuinikkut inuttaasunilu oqallittoqarnissaa kissaatigalugu.

Ataatsimiititaliap siunnersuummik suliaqarnera.

Aallaqqaasiullugu siunnersuummi matumani siunertarineqartumut cikarittikkut igiinnartakkat iluarsiffigineqarnissaannut suliniuteqarniarnemut ataatsimiititaliap tapersiinini oqaatiginiarpaa. Cikarittikut ajornartorsiutaanerata eqqumaffigineqarniarnera iliuseqarniarnelaru ataatsimiititaliamit tikilluaqqunartinneqarpoq. Soorlu aalajangiiffigisassatut siunnersuummi atuarneqarsinnaasoq cikarittikut akuutissanik ulorianartunik akoqarput pinngortitamut mingutsitsisuusunik taamatuttaarlu pinngortitaq eqqaaffigineqartoq takussunarsartarlugu. Tamanna tungavigerpiarlugu mingutsitsinissaq pinngitsoorniarlugu ajornartorsiullu millisarniarlugu pissusissamisoorpoq periarfissanik ujaasinissaq.

2.1. Siunnersuutaqqaartoq

Siunnersuuteqartup siunnersuumminut tungavilersuummini naatsorsueriaatsit arlaqartut nassuiaateqarfigisimagai ataatsimiititaliamit maluginiarneqarpoq. Siunnersuut siunnersuutaqqaartut akuerineqassapat imaluunniit allannguutissatut siunnersuuteqarnikkut akuerineqassapat, Naalakkersuisut taakkunanga ataaseq arlallilluunniit aallaavigisinnaavaat.

2.2 Allannguutissatut siunnersuut

Siunnersuutip siullermeerneqarnerani Naalakkersuisut ima allannguutissatut siunnersuuteqarput:

”Cigaritsit kimmivikui tamaangaannaq iginneqartartut ikilisinniarlugit suliniutinik sunik, tassungalu ilanngullugu cigaritsit kimmivikui utertittartussanngorlugit qularnaveeqquserneqartalernissaannik misissuineramik aallartitsisoqarnissaa pillugu Naalakkersuisut peqquneqarnissaannut aalajangiiffigisassatut siunnersuut. Misissuineq kingusinnerpaamik UKA2020-mut atatillugu Inatsisartunut agguanneqassaaq.

Cikarittikkut avatangiisumut ajornartorsiutaanerata aaqqiivigineqarnissaa pillugu Naalakkersuisut siunnersuuteqartoq isumaqatigerpasippaat. Taamaattorli allannguutissatut siunnersuummut akissuteqaammi takuneqarsinnaavoq utertitsisarnermik pilersitsinissaq Naalakkersuisut isumaqatiginngikkaat. Tamanna allaffissornermut annertusinissaanik kiisalu cikarittikunik katersuisussat peqqissusaannut innersuussinermi ilaatigut takuneqarsinnaavoq.

Naak isumaqatigiinngitsoqaraluartoq ajornartorsiutip aaqqinneqarnissaa siunertaralugu cikarittikut utertinneqartalernissaat pillugu misissuinissaq allannguutissatut siunnersuummi ataannarpoq. Allannguutissatut siunnersuummi misissuinissap pingaartinneqarnera annertusineqarpoq cikarittikkut maaniinnarmiittut annikillisinniarlugit suliniuteqarnissamik ilallugit. Naak misissuinissami pingaartitat annertusineqaraluartut piffissaliunneqartoq

siunnersuutaaqqaartumitut attatiinnarneqarpoq; misissuinerup inernera UKA2020-mi Inatsisartut ataatsimiinnissaannut atatillugu saqqummiunneqassalluni.

Cikarittikut maangaannaq eqqakkat annikillisarniarlugit misissuinerit annertusineqarnissaannik Naalakkersuisut kissaateqarnerat ataatsimiititaliamit tapersorsorneqaannarsinnaavoq.

Siunnersuutip aningaasatigut kingunerisassai.

Aalajangiiffigisassatut siunnersuutip piviusunngortinneqarnerani aningaasatigut allaffissornikkullu kingunerisassat siunnersuummut tunngavileruummi allaaserineqassasut Inatsisartut suleriaasianni § 33, imm. 1-imi allassimavoq.

Siunnersuutip piviusunngortinneqarnerani aningaasatigut kingunissaritinneqartut siunnersuummi ilanngunneqarsimasut ataatsimiititaliamit maluginiarneqarpoq, tamatumunngalu allatut oqaaseqassalluni ataatsimiititaliamit pisariaqartinneqanngilaq.

Allannguutissatut siunnersuummi aningaasartuutaanerulersoqarnissaa naatsorsuutigineqanngimmat, Naalakkersuisut allannguutissatut siunnersuutaat siunnersuutaaqqaartumi aningaasartuutissat iluini ingerlanneqassasoq naatsorsuutigineqartoq ataatsimiititaliamit maluginiarneqarpoq. Tamatumani naak misissuineq annertusineqaraluartoq.

Ataatsimiititaliap inassuteqaataa

Ataatsimiititaliap isumaqatigiittup Naalakkersuisut allannguutissat siunnersuutaata akuerineqarnissaa inassutigaa


Taamatut oqaaseqarluni isumaliutissiissummilu allassimasunut paasinnilluni matumuuna ataatsimiititaliap siunnersuut aappassaaniigassanngortippaa.



Aqqa Samuelsen
Siulittaasup tullia



Nikkulaat Jeremiassen
Siulittaasoq



Mikivsuk Thomassen



Simigaq Heilmann